

INUIT ATAQATIGIIT

INATSISARTUNI



UKA2024/26

26.09.24

Edvard Nielsen Aronen

**Ilinniarnertuunngorniartarneq
allanngortinneqarnera pillugu
sinnerlugit sivisussusilimmik
ilassutitut piumasaqaatit)**

(Meeqqanut, Inuuusuttunut, Ilinniartitaanermut, Kultureqarnermut, Timersornermut

Ilageeqarnermullu Naalakkersuisoq)

Oqaaseqaat:

Siullermik Inuit Ataqatigiinniit Naalakkersuisut ilinniarnertuunngorniartarneq
pillugu Inatsisartut inatsisaata allanngortinneqarnissaanik
saqqummiussaqarerannut qutsavigaagut naatsumillu imaattumik
oqaaseqaateqarluta.

Eqqumiitsuliorneq, kulturi timersornerlu inuiaqatigiinni pingaartilluinnar-neqassasut Inuit ataqatigiinniit isumaqartuaannarpugut. Taamatuttaarlu Inuit Ataqatigiinniit ilisimavarput ilinniartitaaneq atungarissaarluni inuunissamut matuersaataasoq pingaarutilik. Kiisattaaq ilisimavarput ilinniartoq timiminik atuilluartoq ilikkagaqarnissamut nukissaqarnerullunilu ilinniarnissamut piumassuseqarnerusartoq. Taamaattumik Naalakkersuisut timersornermik sammiveqarluni ilinniarnertuunngorniarnermi qinnuteqarnermut aporfiusinnaasunik takunnillutik aaqqiissutissanik siunnersuuteqarnerat qujarullugu Inuit ataqatigiinniit tiguarput.

Ukiuni makkunani nunarput nunani allani timersornikkut kusanartumik ilangukkaluttuinnarnerani pissusissamisoopoq timersornikkut sammiveqartumik ilinniarnertuunngorniartarnermi aporfiusinnaasunik nalilersuinissarput aammalu aporfiusinnaasunik ajornanngippat annikinnerpaamiisitsinissarput.

2015-imi timersornermik sammivilimmik ilinniarnertuunngorniarneq misiliutitut aallartippoq, ukiorlu atuarfiusoq 2021/2022 aallarnerfigalugu misiliutaajunnaarluni ingerlalerpoq. Taamaakkaluartoq inatsimmi aporfiusinnaasoqartoq maanna paasineqarpoq naammangittaalliuute-qartoqarsimaneratigut. Taamaammat piffissangorsimavoq naalakkersuinikkut

INUIT ATAQATIGIIT

INATSISARTUNI



inatsisip nalilersoqqinnissaa, tamannalu naalakkersuisunit
eqqummaariffigineqarsimammat qujassutigisariaqarpapput.

Piffissaq manna iluatsillugu timersortartut nunatsinnik kusanartumik avammut nittarsaassisarnerannut Inuit Ataqatigiinnit qutsavigerusuppagut. Kinguaariinnut tullernut maligassiuisuunersi tulluusimaarutigaarput, taamaattumillu timersornermik sammiveqarluni ilinniarnerantuunngorniarnermi aporfiusinnaasunik suliaqarnermi Inuit ataqatigiinnit siuttuussaagut. Inuk peqqissoq ilinniarluarsimasorlu nunatsinni pisariaqartippapput tapersersortuarnissaannullu aamma piumassuseqarlatalu sulissaagut.

Taama oqaaseqarluta Naalakkersuisut inatsisartut inatsisaata allangortinneqarnissaannut siunnersuutaat taamatut isikkoqartillugu akuerineqarnissaa Inuit ataqatigiinnit inassutigaarput.

Qujanaq.